

ETEMELO



Yango esali bino eloko moko boye te? Esali mpenza bongo. Togumba mitó mpo na libondeli.

² Nkolo, lolenge etalisameli biso na loyembo kitoko oyo, *Ozali Mpenza Monene*, pe tozokanisa, na ntongo oyo, ete tolingaki kosala nini soki ézalaka mpo na Yo te! Bongo na ntango tozokanisa ndenge Ozali monene mingi, pe na sima bolingo na Yo esengisaki Yo ete okanisa biso mingi, bongo molimo na ngai ekoki bobele koyamba yango. Ezali solo. Nabondeli ete Opambola biso lelo, wana tókokóba liboso na liyangani, ete Óbukela biso Lipa na Bomoi, oyo ezali emoniseli na Klisto. Mpo tosenji yango na Nkombo na Yesu. Amen.

³ Ndeko Ungren ayaka na mongombo oyo ntango nyonso. Pe avandaka na Memphis, Tennessee, ye ná mama na ye, ná mwasi na ye. Pe libota mobimba bayaka na mongombo oyo. Pe nayokaka ye mbala mingi te, ya kosala ezalaka mingi ntango nyonso, kasi na ntongo oyo nakanaki koyoka ye koyemba loyembo oyo. Ayembi nde mosusu, moko na oyo nalingaka, *Kokita Uta Na Nkembo Na Ye*. Pe yango ezali banzembo oyo nalingaka. Pe nazwaki libaku monene ya kokutana na tata na ye, na ntongo oyo, ezali mbala ya liboso nátíkala kozwa libaku wana, moto moko malamú. Pe—pe Ndeko Ungren, tata na ye, akokende—akokende soki moke te wana mwana na ye azali na bomoi, Morris, mpo bakokani mingi mpenza.

⁴ Pe mwasi na ye, mama na Ndeko Morris Ungren, abiki mibu zomi na mitano ya suka oyo bobele na ngolu na Nzambe. Ye azalaki pemelá monene mpenza mpo na ngai, komona yango; koleka na ngonga mabe oyo aleki na aleki na yango, pe ata bongo akangamaki na loboko na Nzambe oyo ebóngwanaka te. Ezotalisa biso Boklisto oyo ya solo-solo, pe kondima ya baoyo bandimeli yango. Boye, nazali na esengo mingi mpo na yango na ntongo oyo.

⁵ Touti kosala libala, kuna na nse. Mibale kati na bana na ngai babalani, pe ezali bana na ngai bauti na mongombo ngai; mwana na biso Billy Simpson pe mwana ya Myers ya mwasi, bazalaki babandami esali mwa ntango; Sharol, iyo. Bazalaki . . . Bazali pe na bandeko ya libota awa, to Sharol Myers moke azali ndeko ya libota, Ndeko Ungren pe bango. Na yango, tozali na esengo mpo na bango, namoni bango kozwa esika na bango, sima na kobalana, bazongi lisusu na kati na liyangani na losambo, pe bavandi mpo na koyoka liteya. Bana wana ntango nyonso bazalaká na esika moko ya bozindo mpenza na motema na ngai, mpo bazalaka na limemia mpenza Liloba. Ba—balingaka bobele Liloba. Nakanisi te ete, kobenga bango bana na ngai, nakanisi te

ete bazali malamu koleka bana mosusu. Kasi batalelaka bobele ngai, pe na—na—natalelaka Nzambe mpo na bango.

⁶ Billy moke alingaki kobala, boye azalaki kobanga ete bákotisa ye mosala ya soda. Pe baoyo bazwamaki na motindo wana bazalaki mibale to misato. Pe bana mibali yango bayaki epai na ngai, pe balobaki: “Ndeko Branham, to—tolingi kozala bagoi-goi to eloko moko bongo te, kasi tokolinga ete obondela Nzambe.” Pe bayebisaki ngai ntina oyo ezotinda bango báboya kokota mosala ya soda, soki bakoki; ezalaki te mpo balingi kobundela ekolo te, na lolenge oyo bakoki kosala. Kasi eloko yango ezalaki ete, soki bango—soki bango bakendeki, balingaki komikotisa na kati ya lolenge ya bato mabe kuna (nayebi ndenge bobéngaka yango te) PX’s, to ndenge nyonso oyo bobéngaka yango, pe na yango bakobima kuna esika basi oyo balati bilamba mikuse basalaka bisala-sala. Oyo wana ezali esika mpo na mwana mobali ya Moklisto te, na boye Nzambe akokisaki bosenga na bango.

⁷ Pe sikawa Billy moke ayaki na ntongo oyo, mpo na kobalana na mwana malamu oyo Sharol, bongo tozali na esengo mpo na bango. Pe totombeli bango makambo ya malamu koleka kati na Bokonzi na Nzambe, mpo na bango.

⁸ Pe sikawa oyo ezalaki ntango moko monene mpo na biso. Tozwaki malakisi ya Ecodim ya kitoko awa na ntongo oyo, losambo etondaki, boye tozali na esengo mingi. Pe mbala mingi, batei, e—elendisaka biso ntango tomonaka bato koya koyoka yo. Pamba te, bomoni, okolinga koloba na bitanda ya pamba te, mpo bazali. . . Tokokaki koloba bobele ndenge moko soki ezali se na moto moko awa. Kasi ata bongo esalaka malamu ntango omilobeli: “Soki moko *oyo* azangi yango, mosusu moko akoyamba yango.” Omoni. ekomisaka yango ndenge mosusu, ekomisaka yango eloko ya nkembo.

⁹ Pe sikawa, na masolo yango sikawa, boye, soki tokoki kolekisa yango noki-noki.

¹⁰ Nakutanaki na Ndeko Boutliere ntango nabimaki, pe natikali komona ye te banda nakómaki awa. Nalobaki: “Ozalaki wapi?”

Alobaki: “Nazalaki kolambela bango dindon ya kolia na mpokwa.”

Pe na yango nazalaki koyebisa ye te nakiti mwa kilo. Alobaki: “Yo?”

Nalobaki: “Obongwani ata moke te.”

Alobaki: “Yo pe obongwani te.”

¹¹ Nalobaki: “Wana ezali mpenza koloba na ndenge elongobani.” Nalobaki: “Kasi, oyebi, nakiti kilo. Nawuti na kilo ntuku sambo na sambo, tééé na kilo ntuku motoba na mitano, boye nayebi mpenza ete nabongwani.” Ba-kazaka na

ngai nyonso, pe, ekomi mwa minene mingi epai na ngai. Pe moto moko azwelaki ngai moko mokolo mosusu wana, mpo nákoka kolata yango awa; moko oyo ezalaki ya kokita na mapeka te, pe loketo ematá likolo.

¹² Kasi nazo—nazomeka kosala na malamumu na ngai nyonso mpo na Yesu Klisto wana libaku epesameli ngai ya kosala yango. Ná etongá na bino oyo kitoko!

¹³ Nazalaki koloba awa na eteni ya ndako kaka sikawa, namonaki Molimo Mosantu ya nkembo kolongola cancer na nzoto ya mwasi moko, mpenza kuna na kati. Azali mwa—azali mwasi moko auti na Texas. Pe mwasi moko avandaki wana, naino namoná moto ya motema mokuse koleka ndenge wana te, mwasi ya motei, eumeli te. Pe Nkolo apesaki ngai emononeli na ye kozwama wana, pe namonaki ye. Abengaki uta New York, pe alingaki kokota awa. Azalaki bobele na miniti mitano mpamba, bongo namonaki mobali na ye azobela estoma, pe elolo oyo ebelisaki ye estoma yango ezalaki nde makanisi na ye na ntina na mwasi na ye. Nzambe na Nguya-nyonso, apesi kimia na ye mwasi yango avandi kuna. Avandi awa, azotala ngai sikawa. Na yango, nalingi pe koyebisa yo, ndeko mobali, estoma na yo esili. Bomoni? Ée, okoyoka malamumu sikaoyo pe okozongela mosala na Nkolo.

¹⁴ Sikawa, soki omoni eloko moko oyo Nkolo asali, o—okokoka kotonda yango te. Okolinga bobele ekoba kokende, se kokende, se kokende, se kokende.

¹⁵ Pe, sikawa, mpokwa oyo eleki tosalaki liyangani moko monene ya mabondeli, pe yango ezali malamumu, yango ezali kitoko. Kotiela babeli maboko, yango ezali eloko moko malamumu. Ntango mosusu, nde nyonso oyo yango esengaka. Na sima ezali na baoyo bazali na eloko moko kuna na sima oyo bango—bango bakoki koyeba yango te, pe esengeli kokutana na moto wana mpo na koyeba oyo yango ezali. Bomoni, ezali na eloko moko boye oyo ezopekisáká yango, eloko moko efandi na nzela yango. Pe mwa elilingi moko ya moke ekoningisa yango mosika.

¹⁶ Sikawa, mwa mwasi yango na mwa ngonga kuna na kati, akómaki motema mokuse, makanisi ebulungani. Mwa mwasi yango, azalaki kokoka ata kopema te. Azalaki bobele. . . [Ndeko Branham azobenda pe kobimisa pema, kobunda mpenza na kopema—N.E.D.] pe kaka—kaka kokoba bongo, bomoni.

¹⁷ Sikawa, eloko oyo bosengeli kosala. Oyo ezali kaka mpo na kotalisa moke kati, bomoni. Ezali nde likambo ya kokanga molimo na ye. Bomoni? Na bongo ozali kobimisela ye nde makanisi mpenza oyo ya yo. Bomoni? Pe obongoli makanisi na yo. Bomoni? Bongo ntango esalemi bongo, bongo nde okoki kokamba ye mpenza na Klisto, pe kobanda wana nde akoki kokende liboso. Kasi esengeli na yo kobongola lolenge na ye ya kokanisa, bomoni. Akoki kobongola yango ye moko te. Azali bobele kozunguluka-zunguluka kati na ekumbaki, pe esengeli

na yo kotelemisa yango. Ezali na mwa eloko moko sikawa oyo ekopesa yo mwa . . . Komeka koyekola yango te; kosala yango te. Ndima yango bobele pe kende liboso.

¹⁸ Ndenge nini mwana moke wana, oyo alalaki kuna na maboko na mama na ye, oyo akufaki banda ngonga ya libwa na ntongo wana, pe banda mpokwa ya butu wana, mwa molimo wana ezalaki wapi? Esengeli kokende koluka molimo wana pe kozongisa yango. Na bongo na ntango omoni yango kozonga, bongo nde okoki kotelema na Nkombo na Nkolo pe kobenga yango. Bomoni, bongo nde ekosalema. Kasi kino ete ósala bongo, ozali na yo bobele kobebisa pema na yo pamba, bomoni.

¹⁹ Ezali eloko moko te—eloko moko ya libombani mpenza te. Ezali nde koluka Nzambe, komilongola na nzela pe kotika Molimo Mosantu ásalela yo na nyonso oyo Ye alingi kosala. Yango nde. Eloko ya monene, ya likabo nyonso, ezali nde kolongola makanisi na yo moko mosika, pe kotikela Klisto nzela. Bongo oyo nyonso Alobaki, soki olingi koyeba soki ezali Klisto to te . . . Soki ezali bobele eyokeli na nzoto, bosana yango. Kasi soki ezali bobele liyóki, bosana yango. Kasi soki ekomami kati na Liloba, boye ezali Nzambe. Bósambisaka makambo nyonso ntango nyonso, oyo molimo nyonso ekoyebisa yo, na nzela na Liloba. Liloba, kotangwáká mosika na Liloba wana ata moke te; soki osali yango, obungi.

²⁰ Sikawa, yambo ya koumela kino ngonga ya nzanga, kosololáká kaka bongo, tika tofungola Biblia pe totánga mwa Makomi awa. Na sima tokokende ko . . . Nalingaka Liloba na Nzambe. Nayebi ete biso nyonso tolingaka yango. Sikawa nazwaki te . . .

²¹ Nalingaki koteya, na ntongo oyo, to kolobela, koteya na Ecodim, na ntina na mabombami na Nzambe oyo ebombamá banda ebandeli na mokili, oyo emonisami kati na Yesu Klisto. Pe nazuaki makoki ya kosilisa yango nyonso te. Nabosanaki na ntina na libala oyo ekosalema, boye ntango mosusu na—nakosilisa yango na mbala ya sima ekoya.

²² Sikawa nakotánga mwa moke na bisika misato na Biblia. Ya liboso, nalingi kotanga longwa na Bafilipi 1. Mokapo ya liboso ya Bafilipi, kobanda na eteni ya 19, pe nakotánga kino na 22.

Zambi nayebi ete yango ekoki kobongwana lobiko mpo na ngai na nzela ya mabondeli na bino, pe likabo na Molimo na Yesu Klisto.

Yengebene na mposa na ngai monene pe elikia na ngai, ezali ete oyo boye eyokisa ngai soni ata moke te, kasi na mpiko nyonso, lokola ntango nyonso, pe sasaipi lokola Klisto amonisama na nzoto na ngai, ezala na bomoi, to na liwa.

Zambi mpo na ngai kobika ezali Klisto, pe kokufa ezali mbano.

Kasi soki nazobika na mosuni, yango ezali mbuma na mosala na ngai: nzokande oyo ngai . . . naponi yango te.

23 Sikawa na Buku ya Baloma. Pe tolingi kobanda na mokapo ya 8 ya Baloma, pe eteni ya 35, mpo na kotonga oyo nalingi kozwa lokola litángi.

Nani akokabola biso na bolingo na Klisto? Ekozala nde bolozu, to nkáka, . . . minyoko, . . . nzala, to bolumbu, . . . kokufa, . . . mopanga?

Ndenge ekomami, Mpo na ngai tozobomama biso nyonso . . . mokolo na mokolo; totángami lokola bampate ya kobomama.

Kasi, na makambo oyo nyonso tokoleka balongi na nzela na ye oyo alingaki biso.

Zambi nandimisami ete, ata liwa te, ata bomoi te, ata mwanje te, ata bokonzi te, ata nguya te, ata makambo na ntango oyo te, ata makambo oyo ekoya te, ata te . . .

Ata molai te, . . . bozindo, to ekelamo mosusu te, ekoki kotangola biso na bolingo na Nzambe, oyo ezali kati na Nkolo na biso Klisto Yesu.

24 Na Misala 2, pe eteni ya 30:

Na bongo lokola mosakoli, pe koyeba ete Nzambe akatelaki ye ndai, ‘te na mbuma ya nzoto na ye, yengebene na mosuni, ye akotemisa Klisto avanda na ngwende na ye;

25 Sikawa Makomi ezali ebele, ezali lokola kotambola-tambola longwa na esika moko kino na mosusu, kati na Biblia. Kasi toyebi ete, soki ebele ya Makomi oyo etángami, tokozwa eloko moko na kati Kuna oyo eko—ekosunga biso. Boye tika ete Nzambe ázunga biso sikawa, wana nalingi kozwa mokonza oyo, na ntongo oyo, lokola liloba ya etemelo: *Etemelo*.

26 Sikawa biso, ntango nazalaki koluka litángi oyo, natalaki buku ya mambi ma lokota. Nakanisaki: “Nini yango? Moto moko akobaki koloba, ‘Wana ezali etemelo, bosolo. Etemelo, yango nde.’” Nakanisaki: “Liloba wana ezali nini? *Etemelo*, elingi koloba nini?” Pe natalaki na buku ya mambi ma lokota mpo na koyeba oyo yango elingi koloba.

27 Webster elobi ete ezali “oyo ebongi be na yango moko, oyo nguya na yango ezangi suka, ya liboso ezali oyo ya kosukisa.” Bomoni: “oyo nguya na yango ezangi suka, oyo ebongi be na yango moko, pe ezali solo-sólo oyo ya kosukisa,” liloba oyo *etemelo*.

28 Pe nakolinga koloba boye, pe nandimisami ete bokososola maloba yango, mpo nazali moto oyo alakisámá lolenge ya nganga-nzambe te, pe lolenge ya boyebi ya bizaleli mpo na koloba makambo ya kokweisa mayanga oyo ekokanga bato.

Eloko moko nazosala, ezali komeka kosala nyonso ya malamumu na nakoki kosala, na ntina na baninga oyo Klisto apesá ngai, pe na—na—nalingi ete bamona oyo makanisi na ngai ezali na oyo etali Klisto.

²⁹ Sikawa, bokokisami ya likambo nyonso ya monene ekangamaka na etemelo moko boye. Okoki kolekisa bomoi te kozanga etemelo moko boye. Bokokisami ya likambo moko ekoki kosalema te soki yango ezali na etemelo te, mpo yango ezali likonzi ya suka oyo ekangi yango. Ezali—ezali esimbeli ya kofandela na suka ya mobembo. Ezali esika oyo okangami na eloko moko boye.

³⁰ Na mokolo oyo tozobika na yango sikawa, oyo makambo nyonso ekomi kobeba, ekomi pete-pete pe ezolimwa, nabanzi ete Liteya oyo ekozala eloko oyo esengeli mpenza, mingi mingi epai na Baklisto ntango bazoleka kati na mikakatano na bango na ngonga oyo. Lingomba ya Baklisto ezoleka kati na mikakatano makasi koleka oyo yango esilá kozwa na mibu nkoto mibale ya suka oyo. Pamba te, tozokóma na esika oyo eloko moko etalisameli na Boklisto, eloko moko oyo ekosenga bazwela yango mokano, pe nakanisi ete lingomba ya Baklisto ebongaki kozala na eloko moko oyo bango bayebi ete bamikangi na yango, na esika ya kotepa-tepa lokola nkasa likolo na mai, na mopepe. Ndenge Biblia elobi: “Ezotenga-tenga na mipepe nyonso ya malakisi.” Mipepe wana ekoya pe ekopusa mwa nkasa yango ngambo *oyo*, na sima mopepe mosusu eyei, mopepe ya nordi, mopepe ya sudi, mopepe ya esti, mopepe ya westi. Ekokomisa yo na esika moko te, otelemi naino ngwi te. Bomoi ya Boklisto esengeli kozala bomoi moko eteleme ngwi. Esengeli kozala eloko moko oyo ezali—ezali na litomba monene pe oyo—oyo okangami na yango, oyo eleki ata bomoi yango moko.

³¹ Pe esengeli na yo kozala na eloko moko oyo okangami na yango. Bato mosusu bakangami na mombongo na bango. Bamosusu bakangami na mabota na bango. Bamosusu bakangami na bindimeli. Bamosusu bakangami na mosala ya mapinga. Tozali na biloko ndenge na ndenge oyo tokangamaka na yango. Kasi nabanzi ete, lokola Moklisto, esengeli na biso kokangama na esika oyo toyebi ete ezali malamumu, bomoni. Mpo, ekoki kosalema ete okangama na libota na yo, pe mwasi na yo— na yo akoki kotika yo. Ekoki kosalema ete okangama na mapinga, pe okoki kobomama. Pe ekoki kosalema ete okangama na makambo ya ndenge na ndenge, pe ezali na suka na yango. Kasi esengeli likonzi moko ya suka oyo kokangama na yango ézala. Esengeli kozala na esika moko oyo—oyo moto asengeli kokanga mpo na esukeli na ye ya Séko. Mpamba te, soki okotiya elikya na mosala na yo, ntango mosala yango ekosila, esuki wana. Ntango libota na yo ekamatami, esili wana.

³² Kasi ezali na eloko se moko oyo nakanisi ete ezali likonzi ya suka ya kokangama na yango. Pe nandimi ete Polo azalaki na

likonzi moko oyo akangamaki na yango na bomoi na ye awa. Pe nakosepela ko—kolandela wana, soki tokokaki kobenga yango bongo, pe kolobela na ntina na likonzi wana ya komikanga. Alobaki: “Mpo na ngai kobika ezali Klisto, pe kokufa ezali mbano.” Sikawa, Klisto azalaki Etemelo ya Polo. Yango nde ezalaki likonzi na ye ya komikanga. Ezalaki ya ye. . . Ezalaki suka ya maloba nyonso. Ezalaki nde Klisto, azalaki likonzi na ye ya komikanga.

³³ Polo azalaki na likonzi ya komikanga wana ntango nyonso te. Amesanaki komikanga na lisanga ya Bafalisai. Pe esengelaki na ye kolakisama pe koteyama, mpo bándima ye pe bátika ye komikanga na likonzi na bango. Kasi mokolo moko azwamaki na nzela kokende na Damaseke, pe akutanaki na Yesu, miso na miso. Pe banda wana akangolamaki na likonzi na ye ya Bofalisai; pe amikangaki lisusu, ete Yesu Oyo ye ayebaki ete abakamaki na ekulusu, akufaki, pe asekwaki lisusu. Polo ayebaki yango mpo akutanaki na Moto yango. Yango ebongolaki ye wana mpenza. Kobanda wana atikálá kozala lisusu ndenge moko te. Akutanaká na buku moko boye te. Akutanaka na e—endimeli moko boye te. Akutanaki nde na Moto yango, Yesu Klisto. “Yo Nani, Nkolo?”

Alobaki: “Ngai nazali Yesu.”

³⁴ Tókanisa naino na kobongola motema wana, mpo na mwa ngonga moke. Nandimi ete Polo azalaki moto ya bosembo. Lokola ezali Ecodim, tolingi koteya yango lokola na Ecodim. Nandimi ete, Polo, azalaki moto moko, ya bosembo mpenza, pe ezalaki na—ezalaki na eloko moko te oyo ekesenisaki ye na bato mosusu.

³⁵ Basakoli wana nyonso bazalaki bobele bato lokola biso. Biblia elobi bongo. Santu Yakobo 5: “Eliya azalaki moto ya mposa ndenge moko na biso,” azalaki na bisengo pe mpasi na ye, elonga pe minyoko na ye, “pe abondelaki na etingia ete mbula ébeta te.”

³⁶ Pe Polo azalaki moto lolenge moko na biso. Azalaki na mitungisi na ye, motatabano na ye. Kasi azalaki moto moko sembo. Azalaki kosambela na eyamba ya losambo moko malamumu koleka oyo ezalaki na mokili. Pe alingaki kokóma motei ya eyamba wana; ateyamaki na molakisi moko monene, Gamaliele, oyo azalaki moko na balakisi minene oyo bazalaki na bango na mikolo wana. Baboti na ye balandelaki yango, bamonaki ete eloko moko ezalaki na bomoi na Polo, pe basalaki makasi mpo ete batinda ye na kelasi, mpo akoka koteyama na mibeko ya Nzambe nyonso. Pe, andimaki liloba moko-moko na yango, na motema moko ya sembo mpenza.

³⁷ Pe ayokaki nsango ya mwa bato ya mpamba wana, pe ndenge mosakoli moko abimaki, abengamaki bongo, na lisanga na Ye, abimaki na Galilai, oyo azalaki kosala makamwisi pe kobikisa babeli. Kasi eyamba na ye—na ye oyo azalaki kolanda bakokaki

kondima te ete Moto yango akoki kozala mosakoli, Yesu ya Nasalete wana, mpo Ye Moko amitalisaki epai na bango te. Boye Polo akokaki koyamba yango te, mpo eyamba oyo ya—oyo ya bato na ye moko bandimaki Yango te. Pe bakebisaki ye na makambo ya ndenge wana.

³⁸ Kasi Polo, lokola moto na sembo, akanisaki: “Soki likambo oyo euti na Nzambe te, pe losambo na ngai elobi euti na Nzambe te, boye eloko ya kosala ezali bobele moko, ezali kosilisa likambo yango.” Alobaki: “Bolongola yango, mpamba te ezali . . . ekokoma motungisi, ekoya kokola, eloko ya mayele mabe,” ya kotelemela eyamba oyo ye andimelaka. Boye azwaki mokano na motema na ye ete akende kosukisa “mayele mabe” oyo, ndenge azalaki kobenga yango, to ndenge lingomba na ye bazalaki kobenga yango, mosika na lisanga kitoko na ye ya Bofalisai.

³⁹ Mokolo moko boye, ná mikanda na libenga na ye, euti epai na nganga-nzambe mokonzi, mpo na kokanga bato nyonso oyo bazwamaki na motindo wana, mpo yango nde ezalaki mokumba oyo epesemelaki Polo. Azalaki na nzela kokende na engumba moko na nkombo Damaseke. Bakangisaki bango monoko, zinga-zinga na Yelusaleme. Bongo abo—abomisaki Etienne na mabanga, pe Polo nde abomisaki ye na mabanga, atatulaki ete asimbaki mokóto yango. Sikawa akitaki kuna mpo na kosala ndenge moko, mpo na kolongola motungisi monene oyo.

⁴⁰ Kasi pene na, ekokaki kozala ngonga ya nzanga, pene na ngonga ya zomi na moko, zomi na mibale, abwakamaki na nse. Pe ntango akweyaki, atombolaki miso pe amonaki Pole moko liboso na ye. Pe Mongongo moko ebimaki na Pole yango, elobi: “Saulo, Saulo,” motuna “mpo na nini ozali konyokola Ngai?” Sikawa Polo ayebaki, to Saulo, nde, ayebaki ete libota na ye bazalaki kolanda bobele Pole wana banda babimaki na Ezipito. Pe soki . . .

⁴¹ Bosilá komona libongoli ya Biblia ya Lamsa, ya kala . . . E—elembo ya Ebele ya kala ya—ya Nzambe ezali triangle moko ya Pole; pene-pene, na eloko moko ndenge *wana*, na ezalela misato ya Nzambe, kati na Bonzambe moko. Pe Pole oyo ná lolenge ya litúmu misato, misato kati na Moko, lokola Nzambe moko, epai na Baebele ezalaki e—elembo, ya Nzambe, Pole.

⁴² Na bongo ntango Mose akutanaki na Ye na nzete, bongo Alobaki: “NAZALI” oyo etikalaka ndenge moko, misato; lobi, lelo, pe libela, bobele Nzambe yango moko. Pe Mose akutanaki na Ye na nzete oyo ezalaki kopela moto. Azalaki Pole. Pe ntango Akambaki bana ya Yisraele na lisobe, Azalaki Mwanje na boyokani, oyo Mose amonaki na nzela na kondima, pe asundolaki Ezipito, atalelaki soni ya Klisto lokola nkita monene koleka oyo ya Ezipito. Na kondima, Mose amonaki ete oyo wana ezalaki

nde Klisto, Kopakolama. Pe Kopakolama yango ezalaki likolo na moto moko boye te, kasi Ezalaki na lolenge ya Likonzi na Mító. Bomoni?

⁴³ Na sima Kopakolama moko wana ekitaki na libatishi na Ye, pe ekitaki kati na Klisto pe evandaki kati na Ye. Yoane ayebaki ete ezali Ye. Alobaki: “Likolo na Ye oyo okomona Molimo oyo ekambaki bango kobima na Ezipito kokenda na lisobe, pe kobima na lisobe kokota na mboka na elaka, likolo na Ye oyo okomona lolenge na Nzambe ya triangle kokita pe kouwela wana, Ye nde Moto oyo akobatisha na Molimo Mosantu pe na Mító.”

⁴⁴ Sikawa Polo azwaki litómba ya komona yango naino te. Kasi mpo na kokómisa yango solo, epai na bino, Bayuda bazalaki na epekiseli makasi ya kogumbamela ekeko, to eloko moko ya ndenge wana! Sikawa ntango amonaki Pole monene oyo, ayebaki ete ezalaki Nkolo. *Nkolo* elingi koloba, “bozwi, boyangeli ya.” A—akokaki kobenga eloko mosusu “Nkolo” te, Moebele ya molende wana, na ntango ayebaki ete Oyo wana ezalaki Molimo. Kasi botala malamú, ayebaki ete bobele Likonzi na Mító wana ezali Oyo ekambaki bato na ye. Pe na sima ayaki koloba: “Nkolo, Yo ozali Nani? Yo ozali Nani? Nalingi nayeba Nani Yo ozali. Okutanaki na Mose na nkombo ya ‘NAZALI.’” Kasi natelema na likanisi na bango wana, mwa miniti.

⁴⁵ Yesu, ntango Azalaki na mokili, apakolamaki na Oyo bango bamonaki, botala malamú, Alobaki: “Nauti na Nzambe,” Molimo, Pole, Likonzi na Mító, “pe Nakozonga na Nzambe.” Pe Akómaki mosuni mpo na kokufa na ntina na masumu na biso. Bongo sima na liwa na Ye, kokundama, kosekwa, pe kobuta, sima na Ye kobuta likolo; na mikolo ntuku minei, Abutaki likolo; pe na mokolo ya ntuku mitano, Azongaki lisusu na lolenge ya Likonzi ya Mító, na kati na bato, pe Amikabolaki, lokola ndemu na moto, pe atelemaki likolo na moko moko na bango. Na sima batondisamaki bango nyonso na Molimo Mosantu, pe babandaki koloba na minoko mosusu, kokokana na maloba oyo Molimo apesaki bango.

⁴⁶ Bomoni, Nzambe komikaboláká Ye moko; Nzambe liboso kati na Likonzi na Mító ya nkembo; Nzambe amonisamaki na nzoto ya moto; sikawa Nzambe komikaboláká Ye moko kati na bato na Ye. Likonzi na Moto ekabwani-kabwani, pe evandi likolo na moko na moko na bango, lokola kanya ya milólí na moto, ndemo ekabwani pe efandi likolo na bango, móto lokola kanya, ndemo lokola moto ekabwani pe eteleme likolo na moko moko na bango. Pe batondisamaki bango nyonso na Yango, pe babandi koloba na nkota, ndenge Molimo apesaki bango makoki ya koloba.

⁴⁷ Sikawa, bomoni, tozali bato bakabwaná te, tosengeli kozala na bomoko, mpamba te moko moko kati na biso azali na

eteni moko ya Nzambe. Pe tosengeli kosangana elongo, na sima Likonzi na Móto ekomonisama na mobimba, na litondi na Yango; ntango Lingomba na Ye esangani elongo na bisika bileki Likolo, na ntango wana litondi ya nguya na Nzambe ekozala kati na Lingomba na Ye. Moko na moko na biso oyo azali na makabo ya molimo pe misala ya molimo, toyei kosangana elongo, ekozongisa Likonzi na Móto wana lisusu.

⁴⁸ Pe Polo ayebaki bozali wana ya Nkolo, pe alobaki: “Nkolo, Yo Nani, soki nazali konyokola Yo?”

⁴⁹ Alobaki: “Ngai nazali Yesu, pe ekozala mpasi mpo na yo kotelemela banzube.”

⁵⁰ Pe Polo atindamaki kotelema pe kokende na balabala oyo babengaka: “Sembo.” Pe mosakoli moko azalaki kuna oyo ayaki, na nkombo Anania, pe azwaki emononeli, pe abatisaki ye. Pe akendeki kuna na Arabia, mibu misato mobimba, koyekola Makomi, koluka koyeba ntina ya Likonzi na Móto oyo ebimelaki ye.

⁵¹ Sikawa tomoni ete Polo, bomoi na ye nyonso etikalaki, azwaki yango lokola likonzi ya komikanga. Akutanaki na Nzambe, miso na miso, pe Nzambe apesaki ye lotomo. Oyo nde likonzi ya komikanga! Oyo nde Etemelo! Wana ezalaki suka na maloba nyonso. Wana ezalaki suka na makambo nyonso mpo na Polo. Kowelana nyonso, makambo nyonso elongwaki. Oyo Bafalisai bazalaki koloba etali ngai te, oyo Basadukai bazalaki koloba, to moto mosusu; akutanaki na Nzambe oyo andimisamaki na Liloba, yango ekataki likambo! Yango ezalaki bongo mpo na bomoi na ye etikali. Mpamba te asilaki komona Nzambe oyo atalisamaki, pe emonisamaki epai na ye ete Yango ezali Nzambe, na nzela na Liloba, pe na motindo pe lolenge oyo Azalaki na yango, pe na nzela na Mongongo oyo eyokanaki oyo elobaki na ye solosolo ntina ya likambo. Sikawa, yango ezalaki likambo moko monene. Kokamwa te ete alobaki, liboso na—na Akalipa: “Nazangaki kotosa emononeli ya Lola te.” Akangamaki na yango. Eloko moko ya solo ezalaki wana, eloko moko oyo ye ayebaki, eloko moko oyo moto moko te akokaki kolongola ye yango.

⁵² Sikawa, lelo oyo, soki totie elikya bobele na koyekola, to nde—ndenge moko ya—ya koyekola kolimbola Biblia, wana tozwi yango bobele uta na ma—makanisi ya kotanga. Kasi moto moko te azali na makoki ya kotelema sima ya etumbelo oyo, mpo na koteya Nsango-malamu, longola bobele soki akutani na Yango miso na miso.

⁵³ Lokola Mose, kuna sima na ngambo ya bilíki, ata atangaki malamumu ndenge nini, ata soko nini esalemaki; kobanga pe mitungisi na ye elongwaki mpo atelemaki elongo na Nzambe na mabele mosantu, oyo moto moko te akokaki kolongola ye na yango.

54 Pe mobali to mwasi nyonso oyo abikeli likambo moko boye ná Nzambe, akutani na Likonzi ya Móto moko wana likolo na mabele mosantu ya mitema na bino. “Ezali na moto ya likíndo moko te, zabulu moko te, eloko moko te,” Polo alobaki: “eloko moko te na eleko oyo, eloko moko te na eleko ekoya, liwa, bokono, mawa, ekoki kokabola biso na bolingo na Nzambe, oyo ezali kati na Klisto Yesu.” Azali likonzi ya komikanga. Oyebi ete eloko moko esalemi. Etali te mbala boni science ekotelema pe elobi *oyo boye, oyo kuna, to oyo mosusu*, okangami. Yo ná Nzambe bokomi moko. Ye azali kati na yo, pe yo ozali kati na Ye. “Na mokolo wana bokoyeba ete Nazali kati na Tata, Tata kati na Ngai; Ngai kati na bino, pe bino kati na Ngai.” Bokangami na Ye.

55 Pe Polo azalaki na—na bomoi oyo etelemaki kati-kati na Klisto. Ezalaki bomoi moko oyo ekesani na oyo azalaki na yango liboso. Liboso azalaki na koyekola ya mokanda; kasi sikawa azwi bomoi oyo etelemi kati-kati na Klisto, etemelo. Ata mbala boni Akalipa akokaki koloba: “Yo, okomi na ligboma, Polo. Obungisi mayele na yo. Yo, moto otángá mingi mpenza.”

Alobaki: “Nazali na ligboma te.”

56 Na sima azongelaki Akalipa, na lolenge ete akomaki koloba: “Olingi kondimisa ngai nakóma Moklisto.”

57 Alobaki: “Nakosepela ete okóma yango, longola bobele. . . ndenge nazali, kasi na minyololo oyo te.”

58 Ntango bomoi na yo etelemi kati-kati na Klisto lokola Polo asalaki, ekotinda yo kosala makambo mosusu, oyo okokaki kosala na momesano te. Sikawa botala. Na momesano, mobali wana alakisamaki na nyonso oyo—oyo etali Makomi pe biloko mosusu, na momesano akokaki kolanda nzela oyo alakisamaki na yango. Kasi ntango akómaki. . . pe akómisaki Klisto etemelo na ye, etalelo na ye ya suka, na ntango wana bomoi na ye ekesanaki. Asalaki ndenge mosusu. Asalaki makambo ya ligboma, kokesana na oyo alakisamáki kosala. Pe ekosala bobele ndenge moko.

59 Soki lingomba ekokaki kokabwana na Lisanga ya Mangomba wana, pe kozonga mpo na kokómisa Liloba na Nzambe etalelo na bango ya suka, kokómisa Liloba na Nzambe likonzi na bango ya komikanga, yango elingaki kosimba. Kasi bakangami na mosala oyo ekokisami nde na moto. Pe ekosuka bobele na kokweya. Ee, Biblia elobi ete bakosala bongo. Kasi Mwasi na libala moko oyo aponamaki liboso na kozalisama na mokili akozala, oyo akokangama na likonzi ya komikanga wana.

60 Nakoki komona Seko kofungwana, kokota na ntango, kobanda na Edene. Pe, ntango Esalemi, mokoloto moko ya Makila ebimaki wana, kokende tééé kino na Kalvari; pe longwa na Kalvari, ekangami na mokoloto wana, pe ekobi kino na likonzi ya komikanga, Yesu. Pe mokolo moko ntango Akoya

kokamata baoyo ya Ye, moto nyonso oyo akangami na etalelo wana ya suka akosekwa mpo na Seko. Mpo na nini? Bango bazaláká kati na Seko ntango nyonso. Balengelamaki liboso kati na Seko. Bazali eteni na Nzambe. Bazalaki na makanisi na Ye uta ebandeli. Pe ntango singa monene wana ya mokoloto ya Makila, ekobendama, Elembo wana oyo nazalaki kolobela, ntango ekomata longwa na mabele, moto nyonso oyo azwamaki kati na Makila wana akokota mbala moko kati na Seko lisusu. Kasi lolenge moko yango ekosalema, ekozala nde kokangama na etemelo wana, Yesu Klisto. Ezali etemelo! Mosala ekokisami na moto te; kasi Nzambe asekwisaki Ye uta na bakufi, pe Ye azali etemelo. Pe toyebi ete Ye azali na bomoi, mpamba te tala Ye azali awa elongo na biso na Nguya na Ye ya lisekwa, kosaláká makambo moko Asalaki ntango Azalaki awa na mokili.

⁶¹ Nakangami na Etalelo ya suka wana. Yango nde suka na kowelana nyonso. Nakangami na yango. Yango nde bomoi na ngai. Nazalaki mosumuki ntango Klisto abikisaki ngai. Nakutani na Eloko moko. Pe banda Yango ekótá kati na ngai, ekómá—ekómá ndenge mosusu. Pe nakangami na yango, nyonso oyo ngai nazali ekangami bobele wana. Na sima Nzambe akaboli bomoi na Ye, pe atiki ngai nábika kati na Ye, pe Ye kati na ngai, na boye tokangami. Ngai . . .

⁶² Ezali kosala bokeseni moko te oyo bamosusu bazali kondima. Mpo na yo moto yango, yo okangami na Yango. [Ndeko Branham abeti mwa moke Biblia na ye—N.D.E.] Yango nde etalelo na yo ya suka. Yango nde . . . yango nde liloba ya suka. Na bongo soki Ye azali Liloba, boye *Oyo* esengeli kozala liloba ya suka. Yango esengeli kokata likambo. Oyo nyonso Yango elobi, Yango nde singa ya motane. Yango nde Klisto. Pe nyonso oyo ekesani na Yango, nayebi eloko moko te na ntina na yango. Wana nde eloko oyo tolingi koyeba, ezali oyo Liloba oyo elobi; mpo nakangami na Klisto, pe Klisto azali Liloba. Bososoli yango sikawa? [Losambo elobi: “Amen.”]

⁶³ Pe na eteni ya Liloba oyo epesami mpo na mikolo oyo, Molimo Mosantu na Ye ezali awa mpo na kotalisa eteni ya Liloba wana.

⁶⁴ Bobele ndenge ezalaki kuna na mbotama na Ye. Na Yisaya 9:6. Nyonso kuna kati na Makomi, makambo nyonso oyo elobamaki mpo na Ye, ekokisamaki. Kuna na Buku ya Luka, tolubi eza . . . tomoni yango. Pe Ye azalaki suka, Azalaki—Azalaki pe, suka ya esakoli, na Ye. Akokisaki yango, na histoire, na banzembo, makambo nyonso na Kondimana na Kala, oyo elobamaki mpo na Ye, ekokisamaki bobele wana. Yango ekómaki etalelo ya suka. Yango nde ekómaki likonzi ya komikanga ya Liloba na Nzambe mpo na eleko wana.

⁶⁵ Pe bato oyo babotami solosolo mbala ya mibale na eleko oyo, baoyo batondisami na Molimo Mosantu, bazali likonzi ya

komikanga ya Likomi oyo esengeli kokokisama na mikolo oyo ya suka. Bazali etalelo ya suka. Ezali etalelo na Nzambe ya suka, mpo ezali Liloba na Ye; pe Liloba ezali Klisto, likonzi ya komikanga. Nzela ya komikangola na yango ezali te. Eloko moko nde esimbi yo.

⁶⁶ Ndenge nalobaki, ekotinda yo kosala makambo oyo okokaki kosala na momesano te. Etindaki Polo kosala makambo oyo akokaki kosala na momesano te. Etindaki Mose kosala makambo oyo akokaki kosala na momesano te. Ekotinda mobali nyonso pe mwasi kosala makambo oyo bakokaki kosala na momesano te. Ezali eloko moko oyo yo o—otelemi mpenza kati-kati na yango. Ezali eloko moko boye, Yango nde epeseli kimia na yo. Ezali lokola e . . .

⁶⁷ Ezali longo na masuwa. Masuwa ekangamaka na longo, na ntango ya ekumbaki. Pe soki Klisto azali etemelo na yo, yo okangami na Ye. Na ntango ya mikakatano, masuwa yango, soki otiki yango kotengatenga, ekobukana ntango ekotutana na ma—ma—ma—mabanga. Kasi oyo basalaka, babwakaka longo. Longo yango ekokita kino ete ekangama na moboko ya libanga. Pe masuwa ekangamaka na longo. Yango nde etemelo mpo na masuwa.

⁶⁸ Pe Moklisto oyo abotami mbala ya mibale akangami na Klisto, pe Biblia ezali longo wana. Yango nde eloko oyo tomikangi na yango. Tika bibongiseli, tika makambo ya lolenge nyonso, tika science, tika bayekolisi baloba nyonso oyo elingi. Na ntango nyonso oyo Liloba wana elobi pe elaki yango, tokangami na Yango. Eloko moko te ekoki kolongola biso na yango. Ya solo. Lokola Moklisto oyo abotami solo, bakangamaka na Liloba wana. Soki Yango elobi eloko moko ya kosala, pe lolenge ya kosala yango, nde ndenge wana tosengeli kosala yango. Etali te oyo moto mosusu alobi, Yango nde oyo Nzambe alobi. Tokangami na Yango, bomoi oyo eteleme kati-kati na Klisto.

Klisto, lisusu, azali lokola Monzoto ya Nordi.

⁶⁹ Boyebi ete, mokili ebalukaka. Pe minzoto, na bosolo, oyo bomonaka lokola monzoto na mpokwa, ezali pe monzoto na ntongo. Mokili ebalukaka bobele zinga-zinga na yango. Kasi ekendaka mosika na minzoto wana, yango nyonso kasi monzoto ya nordi te. Sikawa okoki kotemisa likonga ya boussole na yo likolo na monzoto na mpokwa te mpo na kokende na esika moko boye, mpo na ntongo oyo ekolanda, ekozala boni? Ozali na westi na monzoto ya mpokwa, pe na ntongo oyo ekolanda okomi na esti. Bomoni, bokoki kosala yango te. Kasi okoki kotemisa yango étala monzoto ya nordi, amen, pe pika yango mpenza na kati-kati. Okosuka na kobima.

⁷⁰ Pe oyo wana nde lolenge bomoi oyo eteleme kati-kati na Klisto ezalaka. Na ntango obungi nzela, Ye azali Monzoto ya Nordi na yo. Bongo, soki Ye azali Monzoto ya Nordi, Molimo

Mosantu azali boussole na yo, pe boussole ekolakisa bobele Monzoto ya Nordi. Ekolakisa endimeli to denomination moko te. Ekolakisa eyokeli ya nzoto te, to eloko soko nini te. Ekokangama makasi na Monzoto ya Nordi. Ye azali Monzoto ya Nordi na yo. Na ntango obungi nzela, ekoki kosalema ete obaluka na ba-denomination, pe makambo ya ndenge wana. Kasi boussole, Molimo Mosantu, ekolakisa yo semba mbala moko na Liloba, oyo ezali Klisto, pe esimbi yo makasi. Kangama na Yango.

⁷¹ Ebongo soki monzoto ya nordi ezalaki te, ndenge nini moto akokaki komona nzela na ye kati na mbu ezipami na londende? Ebongo soki Molimo Mosantu ya kokamba yo na Liloba na Nzambe azalaki te, mpo na kotalisa Yango pe kondimisa Yango, tolingaki kosala boni na ngonga oyo? Molimo Mosantu alakisaka bobele na Liloba. “Moto akobika bobele na lipa te, kasi na Liloba nyonso.” Eteni ya Liloba te; kasi Liloba nyonso, Yango nyonso. “Liloba nyonso oyo ekobima na monoko na Nzambe,” yango nde oyo moto akobika na yango. Ye azali etemelo na yo na bomoi na yo, Azali pe Monzoto ya Nordi mpo na yo.

⁷² Boyebi, esengeli tozala na eloko moko boye, eloko mosusu, mpo na kosukisa ntembe nyonso.

⁷³ Boyebi, ezalaki na ntango moko ete lolenge malamumu ya komizalela na mesa ezalaki kotalela bobele maloba oyo mwasi moko boye azalaki koloba. Nabanzi nkombo na ye ezalaki Emily Post. Ekoki kosalema ete nabungi yango. Nabanzi nde yango, Emily Post. Etali ngai te soki Emily Post alobi: “Zwa mbeli na yo mpo ólia ná yango ma—madesu,” yango nde ezalaki miango malamumu ya komizalela. Mpo na nini? Ye azalaki etemelo mpo na lolenge malamumu ya kolia na mesa. Ya solo. Soki alobaki: “Lia yango na maboko na yo,” okolia yango na maboko. Mpo na nini? Ekolo oyo ekómisáki ye etemelo, ya lolenge malamumu ya kolia na mesa. Iyo, misié.

⁷⁴ Ezalaki na ntango moko oyo Allemagne ezalaki na e—etemelo moko, pe ezalaki Hitler. Ezalaki etemelo. Ezalaki na ntina te oyo bato mosusu bazalaki koloba, soki Hitler alobi: “Sala yango,” yo sala yango. Ekozala malamumu ósala. Azalaki liloba ya suka. Hitler azalaki yango.

⁷⁵ Ezalaki na ntango moko oyo Roma ezalaki na etemelo moko, pe ezalaki Mussolini, moyangeli na nko. Na ntango moko moto moko ayaki na motuka epai na ye liboso na monuti moko, abetaki ye masasi na motuka na ye pe abwakaki ye libanda, alobi: “Nalobaki liboso ya monuti moko te, nalobaki ókoma awa mpenza na ngonga sikisiki.” Etemelo! Oyo nyonso alobaki, esengelaki na bango kosala yango. Esengelaki etósama. Alobaki ete akosala ete mokili mobimba étambola na liloba na ye. Etambolaka na Liloba na Nzambe.

⁷⁶ Ezalaki na ntango moko oyo Ezipito ezalaki na etemelo moko. Ezalaki Falo. Na ntango moko nakendeki kuna na Ezipito,

bobele mpo na komona bisika yango. Pe esengeli kotimola metre motoba na mwa ndambo mpo na kokuta bangwende oyo bavandaki likolo na yango, nkumu ya Roma; ntango nazalaki na Roma pe kuna na Ezipito.

⁷⁷ Bomoni, yango nyonso ezongi na putulu ya masolo ya kala, mpo ezalaki lolenge mabe ya etemelo. Ya solo. Ezali mabe. Ekweyaki. Ezalaki bitemelo oyo esalemi na bato. Pe etemelo nyonso oyo esalemi na bato pe mosala nyonso oyo ekokisami na bato esengeli kokoma putulu. Esengeli kokoma putulu. Ezali lolenge ya mabe, boye ekokweya.

⁷⁸ Bokanisa naino ekolo na biso. Ntango mikakatano ekómelaka biso, soki moto moko asali likambo moko boye, pe ntango mosusu basambisi yango awa na—na esambiseli ya moke ya engumba oyo, esambiselo moko ya la police, bongo ekobi, ekobi, pe sukasuka ekokóma na Cour Suprême. Sikawa, Cour Suprême ezali etemelo ya ekolo. Yango esukisaka makambo. Sikawa, na Canada, baninga na biso ya Canada bakoki kokende, longwa na Canada, kino na Mokonzi-mwasi. Kasi na Etats Unis, ezali nde Cour Suprême. Yango nde etemelo. Mbala mosusu tosepelaka na mikano na bango te, kasi ata bongo esengeli toyoka bobele yango. Iyo, misié. Toyokanaka ná yango te, ntango mosusu tosepelaka na mokano ekamati te, kasi ezali etemelo ya ekolo oyo. Ekolo ekangami na yango. Ezali suka ya maloba nyonso. Soki Cour Suprême elobi: “Okwei na likambo,” okwei na likambo. Esengeli tozala na yango; tokoki te, tozali na ekolo te. Ebongo soki tozalaka na eloko ya ndenge wana te? Ya solo mpenza. Eloko nyonso ezalaka na etemelo.

⁷⁹ Etemelo moko ezalaka na lisano ya ndembo. Ezali arbitre. Solo. Pe soki ye alobi: “Ezali coup franc,” nde oyo yango ezalaki. Etali te oyo bokoloba, oyo ngai nazokanisa, ndenge namonaki yango, ndenge oyo bino bomonaki yango. Ezali oyo ye alobi. Azali etemelo. Soki alobi: “Coup franc,” esengeli kondima yango, mpo ezali ndenge wana nde yango ekokómama, “coup franc.” Ebongo soki arbitre ázalaka te, sikawa nani nde alingaki kozala na elonga? Moko akoloba: “ezalaki coup franc,” oyo mosusu akoloba: “Ezalaki coup franc te; ezalaki nde kobwaka ndembo, ezalaki nde. . .” Ee, élingaki kozala mobulu. Bolingaki koyeba nini ya kosala te.

⁸⁰ Esengeli kokoma na esika moko oyo maloba ya moto moko ezali suka. Amen. Sikoyo namiyoki mpenza malamamu. Nkembo! Aleluya! Esengeli kozala na eloko moko oyo ezali suka. Nazali mpenza na esengo na yango. Ô, sikawa, moto moko azali oyo akoki koloba: “Ezali lisumu,” to “Ezali lisumu te.” Nazali mpenza na esengo na yango. Nazali na esengo mpo na etemelo. Kowelana ezali te, ntina ya kowelana ezali te. Arbitre alobi: “coup franc,” nde oyo yango ezali; tia yango na motó na yo: “ezali coup franc,” pe kende liboso. Ntango Nzambe alobi likambo moko, nde ndenge oyo yango ezali! Ntina ya kowelana

na ntina na yango ezali te. Nde ndenge oyo yango ezali. Alobi bongo. Yango nde etemelo ya Moklisto, ezali bongo soki ye azali Moklisto. Nzambe alobi: “Sala yango lolenge *oyo*,” lolenge wana nde yango esengeli kosalema. Kowelana te: “Ee,” nalobi, “ezalaki. . .” Eloko moko ezali te. Nzambe alobi bongo, yango ekati likambo! Yango nde etemelo mpo na mondimi ya solosolo. Êe.

⁸¹ Ebongo soki eloko moko ya ndenge wana ézalaka te, tolingaki kozala wapi? Elingaki kozala ete Ba-methodiste bazali na bosolo, Ba-baptiste, Ba-presbyterien, Ba-lutherien, to elingaki kozala nini? Bomoni, tolingaki kozala na, yango nde ntina oyo bo—bolingaki kozala na mobulungano. Pe ntina na yango nde wana. Bamikangolaki na etemelo wana, yango nde ntina wana bazobungáká elongo ná minzoto oyo mosusu.

⁸² Kasi etemelo moko ezali. Esengeli etemelo moko ézala. Esengeli na etemelo moko kozala. Pe etemelo moko ezali. Ezali Liloba. Pe oyo bato mosusu bazoloba, ezali na ntina te. Iyo, misié.

⁸³ Sikawa, soki tozalaka na arbitre na lisano ya ndembo te, mbele bato nyonso balingaki kobendana-bendana suki moko na mosusu, na koswanáká pe kobundáká. Bomoni? Yango nde ntina oyo tozali na bosenga ya etemelo kati na Boklisto, esukisa kobendana-bendana oyo, koswanáká pe kobundáká. Bomoni? Liloba elobi yango, pe yango ekati likambo. Kobakisela Yango to kolongola eloko moko na Yango te. Tika Yango bobele ndenge Yango ezali.

⁸⁴ Boyebi, na balabala etemelo moko ezalaka, ezali feu rouge, mwinda oyo epesaka nzela na mituka. Ebongo soki na ntongo moko boye esali te? Oh! la la! Bosila kokutana na moko na yango? Ngai nakutana na yango. Na ntembe te, ekomelá motambwisi motuka nyonso. Ebongo soki feu rouge yango ezosala te? Boye moto nyonso akobanda koswanáká. Bakomema motuka na esika wana, pe moko akoloba: “Nakómaki awa liboso,” oyo mosusu akoloba: “Tika naye bise yo boye, esengeli ngai nakende mosala!” Oh! la la! Basi bakobunda na ba-sac à main, pe mibali bozobetana makofi, pe ekozala mpenza mobulu! Esengeli etemelo moko ézala, eloko oyo ekoloba: “*Oyo* ezali malamú,” pe yango nde. Na ntango mwinda wana elobi: “telema,” elingi koloba telema. Na ntango elobi: “kende” elingi koloba kende. Soki bongo te, okoti na mobulu.

⁸⁵ Pe ezali bongo na bomoi ya Moklisto. Esika ya kotelema ezali, pe esika ya koleka ezali. Liloba na Nzambe ezali etemelo wana. Ezali Klisto. Iyo, misié. Soki yo. . .

⁸⁶ Soki minda ya kopesa nzela na mituka ezopela te, boye tokokoma na-embouteillage. Pe nabanzi yango nde oyo tozwi tozali komona na lisanga ya losambo lelo oyo; embouteillage, ya bamekoli kondima, bazangi kondima pe nyonso ekangami esika

moko. Okangami bobele na embouteillage. Mpo na nini? Bazangi etemelo. Moko akoloba: “Ee, tozali. . .Biso nde tozali etemelo.” Oyo mosusu akoloba: “Biso nde tozali etemelo.”

⁸⁷ Nzambe nde azali Etemelo. Alobaki: “Tika ete bitemelo nyonso, oyo ekesani na oyo ya Ngai, ézala lokuta. Oyo ya Ngai ezali Bosolo!” Na yango, wana nde etemelo na Boklisto. Yango nde suka na maloba nyonso. Biblia elobi bongo, yango ekómisi Yango solo. Iyo, misié. Esengeli etemelo moko ézala na makambo nyonso.

⁸⁸ Bamosusu ndenge moko na mangomba ya lelo oyo, mingi ya mangomba bazali na etemelo ya bango moko. Moko na moko ezali na oyo ya ye moko, eloko moko lokola na mikolo ya basambisi, moto na moto azalaki kosala oyo ye amonaki ezalaki malamau. Kasi ezali malamau te. Bomoni, ezalaki na ntango oyo Liloba na Nzambe pe basakoli bazalaki te. Liloba ezali etemelo. Bazalaki na etemelo na bango moko. Moko na moko azoloba ete bango nde Bosolo pe nzela: “Biso nde tozali Bosolo pe nzela.”

⁸⁹ Kasi Yesu alobaki ete Ye azali Bosolo pe Nzela: “Bosolo, Nzela, pe Mwinda.” Ezali solo? [Losambo elobi: “Amen.” N.D.E] Ee, bongo, Ye azali Liloba, na bongo etemelo nde yango wana. Pe bitemelo ya ba-denomination, ezali na eloko moko te; ezali ya mabe, tika yango ekende.

⁹⁰ Sikawa, moto asalaka bobele oyo ye moko amonaka ezali malamau na miso na ye, kasi Nzambe azali na lolenge mpo na ye kosala yango. Bomoni, ntango Nzambe pe Liloba na Ye ná basakoli bazalaki te, moto na moto azalaki kosala oyo ye alingaki kosala.

⁹¹ Pe ezali lolenge wana nde ezosalema lelo oyo, moto na moto azoloba: “Na—nazali moto na *oyo*.” Ozali Moklisto? “Nazali Presbyterien.” Ozali Moklisto? Nazotuna yo. Mwana mwasi moko alobaki: “Tika nayebisa yo mpo ososola, napelisaka buji na mpokwa nyonso.” Mobali mosusu alobaki, na molongo ya mabondeli, natunaki ye soki azalaka Moklisto, alobaki: “Nazali moi-Amerika. Ókomeka pe kotuna ngai!” Kokanisa kutu ezali na likambo ya kosala na Yango. Tala, bakangami na ekolo moko. Oyo mosusu akangami na ebongiseli moko, na bindima-ndima.

⁹² Kasi *Moklisto* elingi koloba “lokola Klisto.” Pe lolenge se moko oyo ekoki kosala ete ózala lokola Klisto ezali Klisto Liloba ézala kati na yo. Yango nde etalelo ya suka. Êe. Namonaki yango liboso nabongola motema, pe nazali na esengo ete Nzambe asimbacki ngai liboso ete lingomba ésala yango. Bongo nayebi ntango ngai. . .

⁹³ Motei moko malamau ya Baptiste, Ndeko Naylor, lelo oyo azali na Nkembo, ayaki, kosolola na ngai. Pe, ô, ebele ya bato basololaki na ngai ntango na—nazalaki koluka kokutana na Nzambe. Motei moko ya Adventiste ya mokolo ya sambo alingaki nakende kosangana na bango, pe bongo na bongo. Kasi

namonaki ete soki nakóma Moklisto, na—nakokaki koloba te: “Sikawa nakómi Adventiste ya mokolo ya sambo.” Sikawa, ezali nango malamau. “Nazali Baptiste.” Ezali malamau, bomoni, kasi esengelaki na ngai kozala na eloko moko ya mwa solo koleka oyo wana. Na—nakokaki kondimela yango te, mpo bango nyonso bazalaki kotenga-tenga.

⁹⁴ Nakanisaki: “Moto moko azali esika moko boye, esengeli na yo kozala na eloko moko ya solo, esika moko boye.”

⁹⁵ Boye nazalaki na bosenga ya etemelo moko, boye nazwaki yango, Liloba na Nzambe. Boye natangaki na Liloba ete Ye azali Liloba, Santu Yoane 1. “Pe likolo na etemelo oyo, Nakotonga Lingomba na Ngai.” Um-hum. Ya solo. Boye nazwaki Ye na Liloba na Ye. Emoniseli 22:19 elobi: “Ye oyo akolongola Liloba moko na Yango, to akobakisela Yango liloba moko.” Yango nde etemelo. Yango nde suka ya ntembe nyonso. *Oyo* nde etemelo yango. “Moto oyo akolongola eloko moko na Yango, to akobakisela Yango eloko moko,” Nzambe alobi: “Nakolongola likabo na ye na Buku ya Bomoi,” boye Yango esengeli kozala etemelo. Pe Yesu alobaki ete: “Moto akobika bobele na lipa te, kasi na Liloba nyonso.” Boye nayebaki oyo “Liloba nyonso” esengeli kozala. Elobami: “Lilako likolo na lilako, pe molongo likolo na molongo.” Nde ndenge wana Yango esengeli kosalema, bobele ndenge Yango ekómami.

⁹⁶ Bongo Alobaki: “Soki boumeli kati na Ngai,” Ye azali Liloba, “Liloba na Ngai eumeli kati na bino, bokoki kosenga nyonso oyo bolingi.” Na bongo nde nayebaki soki Boklisto ezalalaki Liloba na Nzambe. Pe Ye azalaki Liloba; pe na kondimáká Liloba, Liloba evandaki kati na Ye, bongo nayebi ete, “Soki boumeli kati na Ngai, pe Liloba na Ngai eumeli kati na bino, bosenga nyonso oyo bolingi.” Pe soki bozali kati na Liloba pe eteni ya Liloba, bokosenga bobele oyo Liloba eyebisi bino bósenga. Bóyeba mokolo oyo bozobika kati na yango, pe sima, bosenga kokokana na yango.

⁹⁷ Boye na yango, tozongela litéya, ezosala . . . Oyo sikoyo ngai nde moko nde nalobi, kasi ngai nakangami. Nakangami na Yesu Klisto, na Ye, na nzela ya Liloba na Ye. Ye azali etemelo na ngai.

⁹⁸ Nayeri komona ete ba-denomination oyo nyonso pe baoyo mosusu bazalaki na etemelo na bango. Moko na moko, moko na moko, bazali na etemelo na bango moko.

⁹⁹ Bakatoliko, na ntango pápa wana alobi eloko moko, esili. Yango nde etemelo ya lingomba Katoliko. Etali ngai te oyo nganga-nzambe alobi, oyo episkopo alobi, oyo cardinal alobi; soki pápa alobi yango, esili. Yango nde etemelo. Ezali mpenza bongo.

¹⁰⁰ Na lingomba Methodiste pe ebele ya ba-denomination ya Ba-protestant, oyo episkopo alobi, yango nde etemelo. Esuki wana. Oyo endimeli elobi, yango nde etemelo.

¹⁰¹ Epai na Ba-pentecotiste, ezali oyo mokonzi ya bayangeli alobi, soki bokoki kozwa moto yango lokola molamukisi na yango, to te. Yango nde etemelo. Soki oboi maloba na ye, babwaki yo libanda na ebongiseli yango. Bomoni, Liloba epesami litomba moko te. Bomoni? Soki bozwi bitemelo wana, moko na moko ezali na etemelo na yango.

¹⁰² Kasi, boyebi, nalobi oyo mpo na kotuka te. Nalobi yango mpo na bosolo. Nazomiyoka lolenge Polo amiyokaki, ntango alobaki, na Misala 20:24: “Moko na makambo oyo ezali koningisa ngai te.” “Nakani koyeba eloko moko kati na bino te, kasi bobele Yesu Klisto, pe Ye oyo abakamaki na ekulusu.” Bitemelo oyo ezali kotungisa ngai te, ézala papa, episkopo, to mokonzi ya bayangeli, to mopesi toli, to momesano, to ézala soko nini, moko na makambo oyo ékongingisa ngai te. Etali ngai te soki bakoloba: “Ee, to—tokokóka te ko- . . .” Yango ekosala bokeseni ata moke te. Nakani koyeba eloko moko te kasi bobele Yesu Klisto, Liloba na Ye oyo emonisami kati na biso. Nakangami na Yango. Yango nde longo na ngai. Nakangisi longo na ngai kati na Yango.

¹⁰³ “Banda ngai. . .” Polo alobaki: “Banda nakutaná na Ye, na nzela, nabongwaná. Nazali na . . . Ye asembólá ngai.”

¹⁰⁴ Oh! la la! Asembólá ngai mpenza! Kosembola ya ndenge nini oyo esengelaki na Ye kosala ngai. Kasi banda Ye asembólá ngai, nakangamá na Yango. Namokaki ete Liloba ezali Solo, nyonso oyo ekesani na Yango ezali mabe.

¹⁰⁵ Boyebi nini? Ye azalaki na mwango moko na kobikisáká ngai. Ye azalaki na mwango moko na kobikisáká yo. Pe nakani, na nzela ya mokano na Ye, kosala mokano na Ye. Ntina oyo Ye asalaki yango, nayebi te ntina oyo Ye asalaki yango.

¹⁰⁶ “Kobakisa na Yango to kolongola na Yango te!” Lokola nalobaki, na Emoniseli 22:19 elobi osala yango te. Soki Ye azali etemelo na biso, ekoki kozala ndenge mosusu te. Nzela ete yango ézala ndenge mosusu ezali te. Esengeli na Ye kozala etemelo yango, Liloba ya suka.

¹⁰⁷ Boyebi, ba-milio ya bato bazalaki kati na masumu ntango nabikisamaki. Ye azalaki na mwango moko na kobikisáká ngai. Nazali moto ya ndenge kati ya bandeko, mbala mingi; oyo andimaka koponama liboso, momboto na nyoka, libatisi na Nkombo na Yesu Klisto, pe makambo mosusu nyonso oyo emonanaka lokola . . .pe bimononeli, pe bozongi ya nguya na Klisto, pe akweisaka bibongiseli pe oyo mosusu nyonso. Nazali moto ya ndenge, kasi Ye abikisaki ngai na ntina moko, mwango moko mpo na kosala yango. Abikisaki ngai na ntango oyo ba-milio ya bato mosusu bazalaki kati na masumu, kasi Ye abikisáki ngai na ntina moko. Bato batángá bazalaki, bato ya mayele mingi bazalaki, bato ya likíndo bazalaki, ba-episkopo ná balakisi bazalaki, pe bongo na bongo, na mokili, ntango Abikisaki ngai, kasi Ye abikisáki ngai na ntina moko.

108 Pe namoni Liloba ezali etemelo, pe namikangi na Yango, pe nakani ete nakoyeba eloko mosusu te bobele Yesu Klisto, pe Ye oyo abakamaki na ekulusu. Ye azalaki na ntina moko mpo na yango, pe nakani kokangama na ntina yango. Etali te oyo moto mosusu alobi, nakataka bondeko ná bango te to natiolaka bango te, kasi nayebi eloko nini namikangi na yango. Ye alingaki ngai ndenge oyo. Ye azwaki ngai ndenge oyo. Nasalémá bongo mpo na ntina moko. Esengelaki na ngai kosalema na mabongi nyonso oyo, pe bongo na bongo, na nyonso oyo etángamaka te, boye Ye ákoka kobimisa yango kati na ngai, kotia Eloko moko na kati, oyo ezalaki Liloba na Ye. Pe nakani ete nakoyeba eloko mosusu te bobele Klisto.

109 Liwa na Klisto ezalaki etemelo. Ezalaki etemelo. Ezalaki suka na kobanga nyonso na baoyo bazalaki kobanga liwa. Na bongo, liwa na Ye ezali etemelo.

110 Bato babangaka liwa. Ata Yobo abangaki liwa. Kasi ntango amonaki emononeli! Ayebaki ete makambo nyonso ebulunganaki; libota na ye, bana na—na ye. Ata mwasi na ye abalukelaki ye, mpo na nsolo ya—ya makwanza na—na ye; avandaki libanda na ndako na ye, likolo na libondo ya putulu, kokwanzáká makwanza na—na ye. Pe mwasi na ye kutu alobaki: “Mpo na nini ozofinga Nzambe te, pe okufa?”

Alobaki: “Ozali koloba lokola mwasi ya ligboma.” Bomoni?

111 Bongo ntango Eliu asololaki na ye. . . Moko na mikolo oyo, nakoyebisa bino ntina na nkombo Eliu, pe kolakisa bino ete ezalaki Klisto.

112 Ntango akómaki na lolenge wana, pe makambo nyonso ekómaki kobebela ye, bongo ayaki komona emononeli ya Ye Moyengebeni. Azalaki kolinga kokutana na Moto moko Oyo akókaki kotelema na kati-kati mpo na ye; kotia maboko na Ye likolo na mosumuki pe Nzambe Mosantu, pe kotelema na nzela yango. Pe Nzambe apesaki ye nzela ya komona Yango, mibu nkoto minei liboso. Ezalaki etemelo na ye. Atelemaki pe amipupolaki. Aleluya!

113 Ntango yo moto ozobanga kokufa, telema pe mípupola, tala kati na Liloba mpo na komona oyo emononeli na Nzambe ezali.

114 Amonaki emononeli wana, alobaki: “Nayebi ete Mosikoli na ngai azali na bomoi, pe na mikolo na suka Akotelema likolo na mokili. Namikangi na yango! Ata mpambo ya lomposo ebebisi nzoto oyo, kasi nakomona Nzambe bobele na nzoto na ngai: Ye ngai moko nakomona. Namikangi na yango,” alobaki bongo. Amonaki yango. Ezalaki elaka na Nzambe.

115 Atalaki na nzela ya mibeko ya molóngó. Ndenge nazalaki koyebisa bino na ntina na ekobeli ya mobeko ya molóngó, ekobeli ya Liloba, Ekobeli ya misala na Nzambe, biloko nyonso ezalaka na ekobeli. Atunaki, na Yobo 14. Alobaki: “Nzete ezali na elikia, soki ekufi; folólo, soki ekufi; pe bongo na bongo. Kasi,” alobaki:

“moto akolala, molimo etiki ye, pe esili mpo na ye. Bana na ye bakoya kokumisa ye, akomona yango te. Ô,” bongo alobaki: “soki Okolinga kobomba ngai na lilita, bomba ngai mosika pe batela ngai na esika ya kuku, kino kanda na Yo esila!” Azalaki kobanga Liwa.

¹¹⁶ Kasi ntango amonaki yango liboso, lokola mosakoli, amonaki lisekwa na Yesu Klisto, pe agângaki: “Mosikoli na ngai azali na bomoi!” Botala malamau, abengaki Ye, “Mosikoli.” Botala malamau. “Nayebi ete Mosikoli na ngai azali na bomoi, pe na mikolo na suka Akotelema likolo na mokili; atako mpambo ya lomposo na ngai ebibusi nzoto oyo, ngai nakomona Nzambe na nzoto na ngai.” Nzambe ná Mosikoli bazalaki bobele eloko moko, Nzambe ná moto bakómi moko. “Nakomona Nzambe; Oyo ngai moko nakomona, miso na ngai ekomona, ya moto mosusu te.” Amen.

¹¹⁷ Moto mosusu te bobele Mosikoli wana, Nzambe, Oyo miso na ngai ekomona. Azali etemelo. Ye azali etemelo yango. Alongolaka somo ya liwa nyonso. Alongolaka somo nyonso.

¹¹⁸ Na Baebele, mokapo ya 2, eteni ya 14 pe 15, botala malamau. Azwaki lolenge ya moto, mpo na kokufa lokola moto, mpo na bato nyonso. Azwaki lolenge ya moto. Mosikoli oyo akitaki na nse pe akomaki moto, mpo na Akoka kokufa, Moto moko, mpo na bato nyonso. Ô, Asalaki yango ndenge nini? Ntina nini Nzambe akómaki moto? Mpo na kofuta etumbu ya moto.

¹¹⁹ Kasi, na ntongo ya Pasika, Abimaki na mafungola ya kufa, lifelo, pe lilita. Amen. Nzambe, Oyo akokaki kokufa na ekulusu, pe lilita ekokaki kokanga Ye te; eloko moko te, lifelo ekokaki kokanga Ye te. Eloko moko ekokaki kokanga Ye te. Asekwaki. Azalaki na mafungola. Asekwaki, Molongi, mpo Alongaki nyonso mibale kufa, lifelo, pe lilita. Ntango Azalaki na mokili, Alongaki bokono. Alongaki biloko nyonso. Alongaki biyambáyamba. Alongaki biloko nyonso oyo esengelaki kolongama. Pe Abimaki ná kufa, lifelo, pe lilita, mafungola ezoningana-ningana na loketo na Ye; pe amataki Likolo, pe apesaki makabo epai na bato, pe azongaki lisusu Mokolo ya Nkitéla pe apesi yango na Petelo, na Lingomba. Amen. Ye azali etemelo na biso. Somo nyonso ya liwa . . . Mpo Ye azali na bomoi, biso pe tozali na bomoi.

¹²⁰ Baloma 8:1: “Bongo lokola tolongisami na kondima, tozwi kimia liboso na Nzambe na nzela na Nkolo na biso Yesu Klisto.” Tomoni ete, nakanisi ezali Baloma 5, nde tomoni. Pe—pe Ye azali kolongisama na biso. Nzambe asekwisaki Ye mokolo ya misato, mpo na kolongisa kondima na biso, mpo tondima yango. Pe Asekwisaki Ye, mpo na kolongisa kondima na biso. Bongo Asalaki nini? Azongisaki Ye, Molongisi, mpo kondima na biso eyambi yango. Molimo Mosantu, Klisto, akoti kati na yango, mpo na kolongisama na biso, mpo tosekwi longwa na kufa kino na

Bomoi. Sikawa tokómi bana mibali pe bana basi ya Nzambe, tovandi na bisika ya Likolo kati na Klisto Yesu, alongisi biso na lisekwa na Ye.

¹²¹ Yango epesi biso kolongisama, ya koyeba, elongo na—elongo na mpiko ya lobiko ya solo oyo ezali kati na biso sikawa; Bomoi oyo ya Klisto mpenza ékobétebete kati na biso. Na bongo ndenge nini tokoki kowangana Liloba? Oyo, Azali Liloba oyo epesi biso e. . . endimiseli. Molimo Mosantu azali wana. Yango nde Nini? Ezali bobele Monzoto wana ya Nordi, Klisto azali Monzoto wana ya Nordi. Bongo Molimo Mosantu ezali boyengebeni wana oyo elakisaka mondimi bobele semba na Monzoto ya Nordi. Solo.

¹²² Molimo Mosantu akolakisa ntango nyonso Liloba. Soki Akómi kolakisa endimeli to denomination moko, ezali Molimo Mosantu te. Akoki kosala yango te, kolakisa oyo ekesani na Liloba na Ye, na ntango Ye akufaki mpo na kondimisa Liloba pe kosala ete Liloba wana ekokisama. Amen. Akufaki mpo Ákoka koya, Ye moko, kati na Liloba wana. Ye azali Bomoi ya mpiko oyo esalaka ete Liloba wana ezwa bomoi lisusu. Yango nde ezalaki ntina ya kokufa na Ye, ete Ákoka lisusu Ye moko komitalisa na nzela na Lingomba na Ye, pe kosala ete Liloba moko moko, kati na bileko nyonso, ésala yengebene bobele na lolenge oyo Yango esengelaki kosala.

¹²³ Ye azali nguya ya masini. Masini ya Lingomba, ezali nini? Bantoma, basakoli, balakisi, pe bongo na bongo. Pe Ye azali nguya oyo etiaka yango na mosala. Pe esalaka na nguya moko boye oyo ebengamaka lokola. . . Ye, Ye azali Moto oyo epelisaka essence. Ye azali Moto oyo ezalaka kati na esika ya kopelisa, na ntango oyo e—essence, li—Liloba, esopani kati na esika ya kopelisa, Ye azali Moto oyo apelisaka móto yango. Ye azali Moto andimisaka yango. Ye azali nguya ya lisekwa. Azali Nzambe. Ye, Azali Moto yango, yango nde oyo Ye azali.

¹²⁴ “Na ntembe te,” elobi 1 Timote 3:16, “libombami ya bonzambe ezali monene; zambi Nzambe amonisamaki na mosuni, amonanaki na banje, ayambamaki na esika ya Nkembo.” Ye azalaki Nzambe, ayaki kozwa esika ya mosumuki. Iyo, misié. Pe ntango Ye, Nzambe, asekwisaki Ye mo—na mokolo ya misato, ezalaki mpo na kolongisama na biso. Na yango, atómbolamaki na loboko ya mobali ya Nkembo kuna na Likolo, Ye azali Molobeli, mpo na kolobela na ntina na. . . mpo na bolembu na biso, wana toyamboli yango epai na Ye, pe tokufi kati na biso moko; kozongisáká lisusu Liloba na Ye ya kati na biso, elaka yango. Pe kondima na biso ekosala ete Liloba wana ézwa bomoi, mpamba te Klisto azali kati na biso, mopesi nguya na Liloba.

¹²⁵ Ndenge nakosepela mpenza ete lingomba ekóka komona yango, maloba pe koswana nyonso ekosila! Yango nde ekokóma Court Suprême. Yango nde Monzoto ya Nordi. Aleluya! Yango nde suka na ntembe nyonso. Yango nde suka ya mituna nyonso.

Ezali nde suka na makambo nyonso. “Nzambe alobi bongo,” yango nde Etemelo. Mikangisá na Yango. Polo alobaki: “Ezali na eloko moko te na ntango oyo, na ntango ekoya, liwa, bokono, bolumbu, likama, eloko moko te ekoki kokabola ngai na Yango.” Tokangami na etemelo moko. Alobaki: “Mpo na ngai kobika ezali—ezali Klisto, pe kokufa ezali mbano.” Eloko mosusu esimbi ngai te bobele Oyo wana. Yango nde etemelo.

¹²⁶ Ye azali Etemelo na biso mpo tozali na endimiseli ya lisekwa, mpo Ye asekwí kati na biso. Toyebi yango ndenge nini? Azali na bomoi. Azosala mpenza awa oyo Asalaki ntango Azalaki awa na mokili. Azali Likonzi na Moto yango moko, tozali na foto yango kuna. Azali motindo moko kati na Lingomba. Azali awa lelo oyo, pe kati na nzoto oyo Azokokisa pe kosala mpenza ndenge moko Asalaki na ntango wana.

¹²⁷ Soki bomoi ya libòke ya pastek etiami kati na liboke ya mbika, ekobotáká mbika mosusu te; ekosalema te, mpo ekozala libòke ya pastek, mpamba te bomoi oyo ezali kati na yango ezali ya pastek. “Pe soki oyo ya Ngai . . . Boumeli kati na Ngai pe Liloba na Ngai eumeli kati na bino, bosenga oyo bolingi!” Bokozwa ba-pastek. Amen. Etemelo, nayebi, ezali Bosolo. Nakangisi molimo na ngai na yango, pe nayebi ezali Bosolo. Liloba na Nzambe, Azali Etemelo na biso.

¹²⁸ Batesaloniki ya Mibale, mokapo ya 2, totangi boye. “Tokonetolama elongo na balingami na biso, mpo na kokutana na Ye na mipepe.” Ó, ndenge motema na ngai ezobeta na Liloba moko moko kati na Buku na Ye: “Amen.” Nzambe alobaki: “Tokonetolama na mipepe, mpo na kokutana na balingami na biso.” “Amen,” elobi Liloba na nse ya motema na ngai, mpamba te Liloba ezali kuna na kati.

¹²⁹ “Nabombi Liloba na Yo na motema na ngai, Nkolo, mpo nasumukela Yo te. Nakangisi yango na misapi na ngai, liloko na likonzi ya mbeto. Yo ozalaka ntango nyonso liboso na ngai. Nakoningana te.”

¹³⁰ “Êe, ata natamboli na lobwaku ya elilingi ya kufa, nakobanga mabe moko te, mpo Yo ozali Etemelo na ngai. Nakoleka wana, pe Yo okobimisa ngai. Nakokende na bozindo ya masuwa na ngai, Okozala . . . Ozali longo na ngai. Amen. Ozali kuna na sima ya litambala. Yo ozali Moto Oyo akolekisa ngai kati na ekumbaki. Yo nde Moto oyo okozala Kuna, longo na ngai kuna na Nkembo, na ntango nakokita na bililingi ya lobwaku, bililingi ya liwa.” Ntango nakokita na Yaladene, na ntango ekosenga nákatisa ngambo, Ye azali Etemelo na ngai. Nakangami na Ye mosekwi kuna na ngambo mosusu, Ye akolekisa ngai longwa na mai ya likama. “Nakobanga mabe moko te, mpo Okozala elongo na ngai.” Amen. Tika ekumbaki engala, bomoi, liwa, ezala ata nini; eloko moko ekokabola ngai te. Nakangami na Likonzi wana.

¹³¹ Likonzi wana esimbi ngwi. Esimbi kuna na nse ya litambala. Ebwaki longo. Ebwaki longo kuna kati epai na Nzambe. Ebwaki longo na motema na ngai. Molimo Mosantu nde azolendisana ngai na elaka wana: “NAZALI,” Ezali te “Nakozala,” “Nazalaki,” “Nakozala mokolo moko.” “Nazali Lisekwa pe Bomoi,” elobi Nzambe. “Ye oyo akondimela Ngai, ata akufi, akozala na bomoi. Pe moto nyonso oyo azali na bomoi pe akondimela Ngai, akokufa te.”

¹³² Tika liwa esala nyonso oyo elingi, ekotungisa ngai te, pamba te nandimisami, nandimisami ete ata bokono oyo ekoki koboma ngai, to lisasi oyo euti na mondoki, mokolo moko, ekoki koboma ngai, nayebi te nini ekozala, yango ekosala bokeseni nini mpo na ngai? “Mpo na ngai kozala na bomoi ezali Klisto, pe kokufa ezali mbano.” Oh! la la! Pamba te, nakani koyeba Ye oyo avandi na ngambo kuna ya ebale ya liwa, epai wapi Akobenda ngai liboso na Bozali na Ye mokolo moko. Nalongisami na boyengebeni na Ye, ndenge nandimaki liwa na Ye likolo na ekukusu, Nzambe akómi mosuni kati na biso; azokoba kozala mosuni kati na biso, azokoba kozala Molimo na kati na nzoto na biso. Amen.

¹³³ Ye azali Etemelo na ngai. Azali nyonso na ngai. Libanda na yango eloko moko ezali te, namemi eloko te na maboko na ngai. Nayebi eloko mosusu te bobele Klisto, pe Ye oyo abakamaki na ekulusu; nalingi koyoka eloko mosusu te bobele Klisto, pe Ye oyo abakamaki na ekulusu. Motema na ngai elobi “amen” na elaka na Ye moko moko. Nde ntina wana nayebi ete Molimo Mosantu na Ye azali boussole, Azokamba ngai na Liloba.

¹³⁴ Ata moko na bimononeli wana etikálá koyebisa ngai eloko mosusu te longola bobele oyo elongobani na Liloba. Ó, ndeko, kuna nde esika nazwelá kondimisana na ngai. Na butu wana ntango Alobelaki ngai mpo na yango, natalaki bimononeli yango malamau. Pe nakobenda bokebi na bino, bimononeli wana esilá koloba eloko moko oyo ekesani na Liloba? Esila kozala lokuta ata mbala moko te. Mpo na nini? Ezali Nzambe. Yango nde likonzi na ngai ya komikanga.

¹³⁵ Pe nayebi ete, na ntongo moko boye, kati na emononeli, namonaki balingami na ngai kuna na ngambo ya ebale. Ezali kuna. Nakangami na Mboka ya elaka wana. Ekosenga kokutana kuna mokolo moko. Iyo, ya solo mpenza.

¹³⁶ Ye azali Etemelo na ngai. Ye azali Moi na ngai. Ye azali Bomoi na ngai. Ye azali likonzi na ngai ya komikanga, Monzoto na ngai ya Nordi. Ye azali nyonso oyo nakoki kokanisa ete nazala, Ye azali bongo mpo na ngai. Ye azali Bomoi na ngai.

¹³⁷ Ba-denomination, mpo na ngai. . . Ezali mpo na koyokisa bino mpasi na motema te; nalingi kosala bongo te. Kasi Liloba ezali lokola mopanga ya mino ngambo mibale, Ekoki kokota zanga kozokisa te, bomoni, koleka mingi ntango Ezokata na kati ya molili. Botala malamau, ba-denomination ezali lokola minzoto

oyo mosusu, yango ebalukaka elongo na etamboli ya mokili. Ya solo. Nzela nyonso oyo mokili ekendelaka, batikaka basi na bango kokata suki, kolata kupe, be biloko mosusu nyonso, ezotambola elongo na Hollywood pe biloko mosusu nyonso. Kasi, ô, ndeko, *Yango* ezokoba kozala Bosolo, Liloba na Nzambe na bomoi oyo eninganaka te ezokoba kozala Bosolo! Yango nde Etemelo na ngai. Oyo Yango elobi ezali Bosolo. Tika badenomination etambola-tambola bisika nyonso ndenge balingi. Balingi kosambwisa Nkombo na Yesu Klisto, na ba-titre, etali bango. Kasi, mpo na ngai: “Nkombo mosusu oyo epesamali bato na nse ya Lola ezali te, mpo bókoka kobika na yango.” Mpo na ngai, yango nde Liloba ya mobóko, esika libanga ya litumu ezali. Nalingi kotambola elongo na denomination moko te.

¹³⁸ Nazali na Boussole na ngai awa kati na ngai, Molimo Mosantu, atalisaka ngai semba mpenza na Etemelo yango. “Pamba te Likolo pe mabele yango nyonso mibale ekoleka, kasi Maloba na Ngai ekoleka ata moke te.” Pe nabombi Yango na motema na ngai, pe Molimo Mosantu alakisaka ngai mbala moko na Yango. Nakani koyeba eloko mosusu te. Yango nde Etemelo na ngai. Tika yango ezala bobele bongo. Nde ndenge nalingi yango. Oh! la la! Sikawa, ndeko mobali, ndeko mwasi, tia Etemelo na yo kati na Ye. Iyo, misié.

¹³⁹ Na ngonga ya mikakatano oyo nautaki koleka na yango awa kala mingi te, nabungisaki mwasi na ngai, bana, biloko nyonso. Moto moko alobaki na ngai, alobaki: “Obatelaki losambo na yo?”

¹⁴⁰ Nalobaki: “Te, Yango nde ebatelaki ngai.” Bomoni? Bomoni, nazalaki na Etemelo moko, ya koyeba ete mokolo moko boye nakomona bango lisusu. Amen. Nakokaki kolonga te soki nazalaki na Etemelo wana te. Yango nde esalaki bokeseni kati na ngai, epai nini ngai nakangamaki, mpamba te nayebaki ete nakomona bango lisusu.

¹⁴¹ Sikawa, na ngolu, nakangami na Ye Oyo alobaki: “NAZALI,” ezali te “Nazalaki.” “NAZALI,” ntango nyonso, azali ntango nyonso, -nyonso, ayebi-nyonso, -nyonso, azali na nguya-nyonso, asuki te, Ye azali ezali te “Nazalaki.” “NAZALI,” Azali kaka lisekwa. Azali kaka Monzoto ya Nordi. Azali kaka biloko nyonso, mpo na ngai.

¹⁴² Mose azalaki na etemelo moko. Ntango akutanaki na nzete oyo ezalaki kopela móto, yango ezalaki etemelo mpo na ye. Ntango Yosua—ntango Yosua . . .

¹⁴³ Ô, boyebi, mbala mosusu ntango ozwi etemelo, etemelo ekokamba yo na likamwisi. Ya solo. Iyo. Likamwisi ezali eloko moko ya solo, kasi ekoki kolimbolamla te. Ezali likamwisi.

¹⁴⁴ Ntango Yosua atelemaki wana, pe amonaki ete azali na bosenga! Nzambe apesaki ye mosala ya kokenda kuna pe kobotola mboka wana, kobengana bato nyonso wana, pe—pe

kovandisa Yisalaele na mboka yango. Pe mokolo moko, mapinga ya basoda yango bapalanganaki, kuna na etuka. Pe e—eloko ya liboso esalemaki ezali ete, ayebaki ete esengelaki na ye kosilisa bango, wana asilaki kopanza bango nyonso. Bongo, ntango asalaki yango, moi ebandaki kokita. Pe Yosua akangamaki na Etemelo moko, Liloba na Nzambe, Mozalisi. Akangamaki na mosala oyo esengelaki na ye kosala. Amen.

¹⁴⁵ Mbala mosusu epesaka esengo te kosengela kosala yango; ekosenga kosala mitema na bato mpasi, kozokisa pe kokata. Kasi ezali etemelo.

¹⁴⁶ Azalaki na bosenga. Alobaki: “Moi, telema nye, kuna! Sanza, tikala wana!” Pe, na ntaka ya ngonga ntuku mibale na minei, etelemaki nye. Ô, oyo nde likamwisi! Kasi akangamaki na etemelo moko, ná etinda moko. Iyo, ya solo mpenza, Nzambe apesaki etinda.

Yoane azalaki na kondima solo ete akomona Ebenga ntango Ekokitela Ye.

¹⁴⁷ Ntango namonaki Likonzi na Moto wana, lokola Polo na nzela ya Damaseke, nayebaki ete ezalaki Etemelo ya Nzambe, kolamuka moko oyo ekopanzana na mikili ezalaki na nzela. Nayebaki ete Yango ekobongisa nzela ya Boyei ya mibale ya Yesu Klisto, pe nazondima yango kino lelo. Ezali Etemelo na ngai, atako ezalaki likamwisi. Na ntembe te, ezalaki likamwisi, mpo na Likonzi ya Moto moko ételema wana na mapata. Pe bazulunale pe nyonso mosusu ekangaki Yango foto.

¹⁴⁸ Ezalaki likamwisi, mokolo mosusu, na mokolo ya 15 ya sanza ya misato, to na mokolo ya 15 na sanza ya mitano, nabanzi. . . te, na mokolo ya 15 na sanza ya misato, mobu oyo euti koleka. Ntango, sanza misato to minei liboso, na *Misié, Tokomi Na Ngonga Nini?*, nalobaki tokokende kuna: “Pe Banje sambo bakosangana, pe nakozonga pe bu—Buku ya Bilembo Sambo ekofungwama.” Pe nazalaki ya kotelema kuna elongo na Ndeko Fred Sothmann, oyo auti koloba “amen” kuna, natelemaki pembeni kuna na ye, ee, nayebisaki bango: “Ekozala na lokito moko ekoyokana oyo ekoningisa ekolo mobimba.” Pe nalobaki: “Ekosalema kuna. Ezali YANGO ELOBI NKOLO.” Ezali na kati na ba-bande, ba-bande, ba-bande, kouta Phoenix kino zingazinga na nzela nyonso wana. “Ezali YANGO ELOBI NKOLO.”

¹⁴⁹ Mokolo moko, nazalaki wana, nazalaki kolongola matiti oyo ekangamaka na bilamba, to nazalaki kolongola mbuma oyo ekangamaki na makolo ya elamba na ngai, ndenge oyo ezalaki; Banje sambo babimela longwa na mapata pe baningisaki esika yango, kino, mabanga, na bozito ya kilo ntuku mibale na sambo, ebandaki kokweya na mopanzi ya ngomba. Banje sambo batelemaki wana, bapesaki ngai lotomo ya kozonga pe koteya Mateya oyo, pe balobaki: “Moko na moko” bakoza “kokutana pe koyebisa eloko oyo esalamaki.” Pe esalamaki mpena ndenge

wana. Pe ntango bamataki kuna Likolo, ndenge *wana*, bamataki kilometre ntuku minei na mwambe na mipepe; pe, bobele na mokolo yango, bakangaki Yango foto, science esalaki yango, pe epanzanaki na mokili mobimba. Ezali likamwisi, kasi ezalaki Etemelo. Yango ekangisaki ngai na Yesu Klisto makasi koleka, ezingi-zingi bomoi na ngai na Ye. Nayebi ete ezali komonana ndenge. Ezalaka ntango nyonso bongo.

¹⁵⁰ Ezalaki likamwisi mpo na Polo, kokutana na Yesu na nzela ya Damaseke. Ezali likamwisi na ntango Nzambe abongoli motema moindo, ya mosumuki pe akómisi yango pembe na Makila na Ye Moko. Ezali likamwisi. Solo mpenza. Bondimaka likamwisi? Pe likamwisi yango, soki ekokani na Liloba na Nzambe, ekoki kokóma etemelo na yo. Mbongwana ya Polo ezalaki likamwisi, pe ekómaki etemelo na ye.

¹⁵¹ Nakanisi rinesu awa, eleki mwa ntango, nazalaki elongo na mobange pharmasien moko, pe tobandaki kosolola na mwa esika moko. Alobaki: “Ndeko Branham, nalingi kotuna yo likambo moko.” Pe, azalaki Baptiste, ye moko. Alobaki: “Ondimaka likamwisi?”

Nalobaki: “Na ntembe te. Nandimaka yango.”

¹⁵² Alokaki: “Nakoyebisa likambo oyo na moto mosusu te bobele yo,” alobaki: “kasi na—nayebi ete ondimaka yango.”

¹⁵³ Alobaki: “Na ntango ya ngelele monene,” alobaki: “esengelaki na bato kozwa ndingisa, kouta na etúká, mpo na kosombela babeli nkisi.” Pe alobaki: “Mokolo moko, navandaki awa na sima na kati ya pharmacie.” Alobaki: “Mwana na ngai azalaki kozela bakiliya.” Pe alobaki: “Namonaki mwa—mwasi moko kokota.” Alobaki: “Ye mwasi yango azalaki. . . Ezalaki komonana akomaki pene ya kobota.” Pe alobaki: “Ezalaki mpasi mpo na mwa mwasi yango kotelama. Pe mobali na ye alataki na ndenge ya bobola, bango nyonso mibale. Pe ye mwasi ayekemeki na ngambo ya comptoir. Pe ye mobali akendeki kotuna mwana na ngai, alobaki, ‘Nazali na ordonnance moko awa euti na monganga.’ Alobaki: ‘Okolinga kopesela ngai yango bongo ótika ngai námema mwasi ngai na ndako?’ Alobaki, ‘Namekaki kotika ye átelema na molongo wana. Bwaka naino miso kuna na balabala,’ alobaki, ‘ekozwa ngonga minei to mitano.’ Pe alobaki, ‘Sikawa mwasi azokoka kotelema te, ndenge ozomona.’”

¹⁵⁴ Pe elenge mobali yango alobaki: “Misié, na—nakoki kosala yango te.” Alobaki: “Ekosenga nazwa ndingisa yango liboso,” alobaki: “mpo na—nakoki kosala yango te. Epekisami na mibeko.” Pe alobaki. . .

¹⁵⁵ Tata na ye alobaki avandaki kuna na sima azoyoka, kotala eloko nini mwana alobaki. Pe alobaki: “Mwana, zela naino mwa moke. Ezali nini?”

¹⁵⁶ Pe alobaki ete apusanaki wana. Pe mobange yango, Moklisto moko ya solo, mobange mosantu moko ya solo, alobaki: “Likambo nini, ndeko na ngai?”

¹⁵⁷ Pe ye alobaki: “Misié,” alobaki, “nazali. . .mwasi na ngai, akomi pene na ko—ko—kobota.” Alobaki: “Na—nazali. . .nazali na ndingisa kouta na monganga awa; ya mwa bankisi, esengeli na ye mwasi kozwa yango bobele sikawa.” Pe alobaki: “Na—namemaki ye mpo azela na kati ya eteni na ndako kuna.” Pe alobaki: “Ngai—ngai. . .Tala naino molongo oyo,” alobaki, “Nakomituna soki nakokota na kati, sima ya nzanga oyo.” Alobaki: “Nazomituna bobele soki—soki okokoka kokomela ngai yango?” Alobaki: “Nako—nakoteleme kuna na nse; nako—nakozwela yo mbongo yango, ndingisa oyo etúká epesi mpo na yango.”

¹⁵⁸ “Ee,” alobaki, “likambo te, misié, nakozwela yo yango.” Pe atiaki ndingisa yango na nse, pe akendeki na sima. Alobaki ete mwana na ye azongelaki pe abandaki kosunga bato mosusu.

¹⁵⁹ Alobaki: “Mwa mwasi yango ákotaláká, mbala mibale to misato. Atelemaki bobele wana, na mitoki na elongi, nayebaki ete azalaki na mpasi makasi. Pe ndeko yango atelemeki wana azingi ye maboko, boyebi, azoloba, ‘Kanga motema, cherie, mpo na mwa ngonga moke.’ Alobaki: ‘Pharmacien malamú oyo akozwela biso mwa bankisi.’”

¹⁶⁰ Alobaki: “Nabongisaki nkisi yango na mbangu nyonso, pe nakokisaki ordonance na ngai.” Pe alobaki: “Ntango nabandaki kopesa yango na maboko na ye,” alobaki, “Ndeko Branham, nabwakaki miso pe nazalaki nde kotia yango na loboko moko ná mapipi ya sete.” Alobaki: “Namonaki banzube ya elongi na Ye.” Alobaki: “Nakangaki miso, pe natalaki sima.” Alobaki: “Na ngonga wana nde nasosolaki ete, mbala nyonso oyo nasalaki yango epai na ‘baoyo ya Ngai ya mike oyo,’ yango esalemaki nde epai na Ye.”

¹⁶¹ Alobaki: “Ondimaka yango?”

Nalobaki: “Na motema na ngai mobimba, monganga, nandimaka liloba yango moko na moko.”

¹⁶² Ezali nini? Alobaki: “Kobanda wana, Klisto akóma na motuya koleka mpo na ngai. Pamba te, kosala yango mpo na mwasi wana,” alobaki, “ezalaki likamwisi. Na ntembe te bato mingi bakozanga kondima yango, kasi,” alobaki, “nakanisaki, nayebisa yo yango, mpo nayebi ete osilá koleka na makambo ya ndenge wana.”

Nalobaki: “Iyo, misié. Ya solo,” nalobaki.

¹⁶³ Nakanisi, ntango oyo, Santu Martin, wana nazalaki kotanga na ntina na ye. Ntango azalaki naino mwa—mwana, Nzambe abengaki ye. Libota na ye bazalaki bapagano. Pe tata na ye azalaki—azalaki lokola, ô, nayebi te, nakanisi azalaki soda, pe—

pe ezalaki engebene mpo na bana na bango kolanda lokolo na bango. Alobaki . . . mokolo moko azalaki koleka na engumba kuna. Nabosani epai oyo ezalaki. Pe nakanisi azalaki Moifrançais. Pe alobaki azalaki kokatisa nzela ya libulu; mobange moko alalaki wana, akangami na malili pene na kokufa, ezalaki malili makasi. Pe bato bazalaki koleka pene wana, balingaki kosunga ye te. Pe alobi atelemaki. Pe bato na ntembe te bazalaki komibenga bandimi, kasi bazalaki koleka na bango, batiki mobange yango alali wana. Azalaki kosenga eloko ya komizipa na yango, alobaki malili ekangaki ye pene na kokufa.

¹⁶⁴ Pe Santu Martin abelemaki wana, liboso ábongola motema, sikawa, azwaki mokóto na ye, lokola azalaki soda, pe akati yango na biteni mibale bongo azingaki mobange yango, azwaki eteni mosusu amizipi na yango. Bato bakomaki koseka ye, balobi: “Tala soda oyo ya ndenge, ná eteni ya mokóto na nzoto.” Bomoni, etindaka yo kosala makambo ya ndenge. Eloko moko ezalaki kati na ye, oyo esalaki ete andima ete Nzambe moko azali.

¹⁶⁵ Na butu wana, sima na ye kokende kopema pe kolala mwa moke, alamukaki. Moto moko alamwisaki ye, pe atalaki. Na pembeni ya mbeto na ye, Yesu ateleme wana amizipa na eteni ya mokóto wana na nzoto. Wana nde ezalaki ebandeli ya Santu Martin.

¹⁶⁶ Ezalaki nini? Azalaki na etemelo moko, ete Liloba na Nzambe ezali solo. “Oyo bozali kosala na baoyo ya Ngai ya mike oyo, bozali kosala yango nde na Ngai.” Ndeko, nakangami na Etemelo wana. Pe nayebi ete moko na moko na bino . . .

¹⁶⁷ Na esika ya kobenga bato na etumbelo, na ntongo oyo, nakosepela kobenga bato mpo na komipesa mobimba. Tika tomipesa mobimba na Etemelo oyo. Bondimi ete Liloba ezali etemelo na Nzambe? [Losambo elobi: Amen.—N. D. E.] Bondimi te Azali motindo moko lelo lokola Azaláká? [“Amen.”]

¹⁶⁸ Batei bazali awa na kati, bokolinga kopesa bomoi na bino mobimba, bobele, bobele kozwa bobele Etemelo? Eloko nini yango biso tolingi lelo oyo? Eloko nini tosengeli na kalati ya membre to mokanda ya kondimama? Tosengeli na Yesu Klisto. Tokangami na kalati ya membre te. Tokangami na Liloba na Nzambe: “Yesu Klisto motindo moko lobi, lelo, pe libela.” Bondimi yango? [Batei balobi: “Amen.”—N. D. E.]

¹⁶⁹ Totelema sikawa pe topesa bomoi na biso mobimba. Nalingi komipesa mobimba, ngai pe lokola. Namikangi, lisusu. Nazokebela ekangeli na ngai, ekangeli ya mazita. Nazokebela etemelo na ngai. “Nkolo, soki eloko moko ezali kati na ngai, oyo ekesani na Liloba na Yo, longola yango. Nayebi eloko mosusu te bobele Yo. Nalingi koyeba eloko mosusu te bobele Yo.” Sikawa, moko na moko, na ndenge na ye.

¹⁷⁰ Nasololi na bino mpo oyo mobimba. Nayebisi bino Bosolo. Nzambe andimisi Bosolo yango. Asali yango mbala na mbala, pe

mbala na mbala lisusu. Boyebi oyo Etemelo ezali. Sikawa ngai na bino, elongo, bino basi nyonso, bino mibali nyonso, bana mibali, bana basi, ozala ata nani, totika; bino nyonso na chorale, bino—bino bato nyonso kuna likolo, na bisika nyonso, elongo; kuna na nse ya ndako, kuna likolo na balcon, zinga-zinga na bitutu, na sima kuna na lipapu; tozala ata wapi, tika tokamata Yesu, Etemelo na biso, mpo esengeli na biso koleka na mabwaku ya elilingi na kufa. Nayebi eloko mosusu te bobele Ye. Ye Etemelo na ngai, mpo Ye asekwi na bomoi na ngai pe nayebi ete Ye azali solo.

¹⁷¹ Tótombola bobele maboko pe tóbondela sikawa. Tóbanda komipesa mobimba.

¹⁷² Nkolo Yesu, Liloba na Yo euta kala, Yango ezali ebandeli pe suka. Sikawa ngai, elongo na losambo oyo, tomipesi mobimba, lisusu, likolo na etumbelo oyo lelo oyo. Nabondeli mpo na losambo oyo, Life Tabernacle, mpo na komipesa mobimba. Sukisa bokeseni nyonso, tika ete nyonso élongwa, oyo ya kala élimwa. Batei na Nsango-malamu, oyo batungisami. . . pe bakanisaki te eloko moko ekosalema. E Nzambe, tomikangi biso moko, na ntongo oyo, na Yesu Klisto Liloba; pe tozwi mokano ya koyeba eloko mosusu te bobele Klisto, pe Ye oyo abakamaki na ekulusu. E Monzoto ya Nordi, E Molimo Mosantu, E Boussole ya Nzambe, kota na motema moko na moko sikawa. Pe tomipesi mobimba na Yo, na nzela na Nkombo na Yesu Klisto. Nkembo na Nzambe! Amen.

Malamu, ndeko.



ETEMELO LIN63-1201M
(An Absolute)

Liteya ya Ndeko William Marrion Branham oyo, eteyamaki liboso na Anglais na mokolo mwa lomingo na ntongo, mokolo mwa 1, sanza ya zomi na mibale, mobu 1963, na Life Tabernacle, na Shreveport, Louisiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org